

Na osnovu člana 18. tačka b. Ustava Kantona Sarajevo ("Službene novine Kantona Sarajevo", br. 1/96, 2/96, 3/96 i 16/97), Skupština Kantona Sarajevo, na sjednici od 7. jula 1999.godine, donijela je

ZAKON

O NOVČANIM PRIMANJIMA POSLANIKA U SKUPŠTINI KANTONA SARAJEVO

I - OSNOVNE ODREDBE

Član 1.

Ovim zakonom uređuju se uslovi i način ostvarivanja stalnih i drugih novčanih primanja poslanika u Skupštini Kantona Sarajevo (u daljem tekstu: Skupština) za vrijeme vršenja poslaničke dužnosti i način utvrđivanja plaća i drugih novčanih primanja službenika koje imenuje ili postavlja Skupština.

Član 2.

Poslanici u Skupštini ostvaruju pravo na:

1. stalno mjesečno novčano primanje, odnosno plaću,
2. naknade određenih materijalnih troškova i drugih primanja.

Član 3.

Novčana sredstva za ostvarivanje prava iz člana 2. ovog zakona osiguravaju se u budžetu Kantona Sarajevo.

Član 4.

Prava iz člana 2. ovog zakona poslanici ostvaruju za vrijeme dok, u skladu sa zakonom i Poslovníkom Skupštine, imaju status poslanika.

II - STALNO MJESEČNO NOVČANO PRIMANJE I PLAĆA

1. Stalno mjesečno novčano primanje

Član 5.

Svi poslanici u Skupštini imaju stalno mjesečno novčano primanje u iznosu koji utvrdi Komisija za izbor i imenovanja Skupštine (u daljem tekstu:Komisija).

Stalno mjesečno novčano primanje utvrđuje se množenjem koeficijenta i osnovice za plaću.

Koeficijent iz prethodnog stava utvrđuje Komisija, uz prethodno pribavljeno mišljenje Vlade.

Osnovicu za plaću utvrđuje Vlada, u skladu sa zakonom kojim su ta pitanja uređena za službenike organa uprave u Kantonu.

Član 6.

Stalno mjesečno novčano primanje poslanika isplaćuje se mjesečno unatrag, ako Komisija ne odluči drukčije.

Stalno mjesečno novčano primanje iz prethodnog člana ulazi u ukupan prihod građana za plaćanje poreza.

2. Plaća

Član 7.

Komisija, posebnim aktom, utvrđuje koji poslanici, pored funkcionera zakonodavne vlasti Kantona, ostvaruju prava iz radnog odnosa u Skupštini i po tom osnovu ostvaruju i pravo na plaću i druga prava iz radnog odnosa (u daljem tekstu: funkcioneri zakonodavne vlasti), kao i radna mjesta službenika koje postavlja ili imenuje Skupština.

Član 8.

Funkcioneri zakonodavne vlasti ostvaruju pravo na plaću na osnovu koeficijenata koje utvrdi Komisija, uz prethodno pribavljeno mišljenje Vlade .

Plaća iz prethodnog stava utvrđuje se množenjem osnovice s utvrđenim koeficijentom.

Osnovicu za plaću utvrđuje Vlada, u skladu sa zakonom kojim su ta pitanja uređena za službenike organa uprave u Kantonu.

Član 9.

Stalna mjesečna novčana primanja poslanika u Skupštini, odnosno plaće funkcionera zakonodavne vlasti, u skladu s ovim zakonom, utvrđuju se rješenjem koje donosi Komisija.

Član 10.

Članovi radnih tijela Skupštine, imenovani iz reda stručnih, naučnih, kulturnih i javnih radnika, imaju pravo na novčanu naknadu u vidu stimulacije.

Visinu naknade, pravo na njeno sticanje, odnosno prestanak tog prava, utvrđuje posebnim aktom Komisija.

Član 11.

Službenici koje imenuje ili postavlja Skupština ostvaruju pravo na plaću na osnovu koeficijenata koje utvrdi Komisija, uz prethodno pribavljano mišljenje Vlade.

Plaća iz prethodnog stava utvrđuje se množenjem osnovice s utvrđenim koeficijentom.

Osnovicu za plaću utvrđuje Vlada, u skladu sa zakonom kojim su ta pitanja uređena za službenike organa uprave u Kantonu.

Član 12.

Funkcioneri Kantona iz zakonodavne vlasti, po prestanku funkcije, ako nisu, u skladu sa zakonom, mogli ostvariti pravo da se vrate u organ ili pravno lice u kojem su privremeno prestali da rade plaću i druga prava iz radnog odnosa ostvaruju u skladu sa odredbama Kantonalnog zakona o radnim odnosima i plaćama koji se odnose na rukovodioca kantonalnog organa uprave.

III - NAKNADE ODREĐENIH MATERIJALNIH TROŠKOVA I DRUGIH PRIMANJA

Član 13.

Na pitanja u vezi plaća, naknada određenih materijalnih troškova i drugih primanja po osnovu rada, koja nisu uređena ovim zakonom, primjenjuju se odgovarajući propisi kojima su ta pitanja uređena za službenike organa uprave u Kantonu, odnosno opći propisi o radu i kolektivni ugovori i drugi propisi Skupštine i Vlade .

IV - ZAVRŠNE ODREDBE

Član 14.

Komisija je dužna donijeti akte za koje je ovlaštena ovim zakonom, u roku od 30 dana od dana stupanja na snagu ovog zakona.

Član 15.

Stupanjem na snagu ovog zakona prestaje da važi Odluka o naknadama plaća poslanika i o plaćama funkcionera koje bira ili imenuje Skupština Kantona Sarajevo ("Službene novine Kantona Sarajevo", broj 10/96).

Član 16.

Ovaj zakon stupa na snagu osmog dana od dana objavljivanja u " Službenim novinama Kantona Sarajevo".